



30. januar 2015

UPA15/63

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Inatsisartut aalajangiiffigisassaattut siunnersuut Naalackersuisut peqquneqassasut Nukissiorfinnut nalunaaruteqaqqullugit, akinut suliffeqarfiup allattorsimaffiani allaqqasut allangortinneqassasut, siunissami ima allassimalerluni innaallagissamut atuisut nunami aalisakkanik suliffissuarnut innaallagissamut akikillisaaffigisaraat aammalu imermik atuisut nunami aalisakkanik suliffissuarnut imermik akikillisaaffigisarai, maannakkutut ikkunnaarluni Nuummiunerusut ataatsimoorullugu kiassarnermik atuisunit akilerneqartarunnaarsillugit.

(Inatsisartunut ilaasortat, Siverth K. Heilmann aamma Steen Lyngø, Atassut)

Tungavilersuut:

ATASSUT-ip eqqumaniarfigivaa naalackersuinikkut aalajangiunneqarnikuusoq nunami aalisakkanik tunisassiorfiit innaallagissamik imermillu akikinnerusumik pissarsisinnaanissaat. Tamanna ATASSUT-mit paasilluarsinnaavarput. Kisianni, taamatut akikinnerusumik aalisakkanik tunisassiorfiit innaallagissamik imermillu akikillisaaffigineqartarneri matussuserneqartariaqarput. Taamatut aalisakkanik tunisassiorfiit akikillisaaffigineqartarnerat, tamanna Nukissiorfinni nioqqutit atuisullu assigiinngitsut aqqutigalugit tapiissutitut ingerlanneqartarpoq.

ATASSUT-mit takusinnaasimavarput Avatangiisinut Pinngortitamullu Naalackersuisoqarfiup nassuiaataani Rambøll-imit marts 2014-mi suliarineqarsimasumi, nunami aalisakkanik tunisassiorfinnut innaallagissamik aamma imermik akikillisaanerit 2012-mi 77 mio. kr. amingartoorfiusimasut akilerneqarsimasut pingaarnertut Nuummi ataatsimoorullugu kiassarnermik atuisut 80 mio. kr. –nik sinneqartoorutaannit.



Nukissiorfiit ukiumoortumik nalunaarutaanni 2012-meersumi, ingerlatseqatigiiffik 218 mio. MWh-mut aki 2014-mut 810 kr-voq (2013-mi 817 kr-simavoq). Tamannalu naatsorsukanneraanni ukiumut ataatsimoorullugu kiassarnermik atuisunit kaaviiartinneqartut 175 mio. kr. missaaniissapput, tassanilu Nuuk qaffasinnerusumik tapiissuteqartarluni katillugit 80 mio. kr. missaani. Taava imatut paasineqartariaqarpoq Nuummi ataatsimoorullugu kiassarnermut aki pissusimaminiit marloriaataa sinnerlugu akisunerusoq.

Taamatut inissisimasoqarnera ATASSUT-mit assut isornartoqartipparput. Kikkunuku Nuummi ataatsimoorullugu kiassarnermik atuisuisuusut? Tassaapput inissiarsuit Blok 1-miit 10-mut, Qapiarfiusaami, Tuujummi, Nuussuarmi inissiat il.il.. Aap, tassalu tassani inissianiillutik, innuttaaqativut aningaasaqarniarnikkut sanngiinnerusut utoqqartavullu. Tamanna eqqarsaammernarpoq. Qaammammut aningaasartuutai malunnaatilimmik appartissinnaangaluarpavut ulluinnarni inuuniarnerat oqilisaatilaarlugu siunissamullu qaamanerusumik takunneqqissinnaalersillugit.

Taamaattumik ATASSUT-mit taamatut tapiissuteqartarnerit nikisikkusukkaluarpavut ataatsimoorullugu kiassarnermik atuisunit innaallagissamut imermullu atuisunut, taamaasilluni nammassinnaalluarnerit nammatassinneqarnerulerlutik, massakkutut Nuummi attartortut sanngiinnerit tamanik akiliisinnagit. ATASSUT-ip qinerpaa innaallagissamik atuisut tamarmiusut nunami aalisakkanik tunisassiornermi innaallagissamik akikillisaaffigineqarneri aamma imermik atuisut tamarmiusut nunami aalisakkanik tunisassiornermi imermik akikillisaaffigineqarneri.

Tassa taamatut tunuliaquteqarluni ATASSUT matumani aalajangiiffigisassatut siunnersuut saqqummiuppaa.

Pisortanut aningaasatigut allaffissornikkullu kingunerisassat:

Soqanngilaq



Namminersorlutik inuussutissarsiuteqartunut aningaasatigut allaffissornikkullu kingunerisassat:

Soqanngilaq

Innuttaasunut aningaasatigut allaffissornikkullu kingunerisassat:

Naatsorsueqqissaarnerit takutissavaat qanoq annertutigisumik inoqutigiit ataasiakkaat sunnerneqassanersut innaallagissamik imermillu atuisut tamarmiusut ataatsimoorullugu kiassarnermik atuisuinnaangitsut nunami aalisakkanik suliffissuit akikinnerusumik innaallagissamut imermullu akiliuteqartarnerinut.